

宋

賢

事

彙

卷

116

赴机自序

凡採文書役用而越十八行事公訟密應自海濱窮者勿宜阻不特

[illegible]

以爲事以忠厚仁義奉神神位出言信處
無時忘忠厚仁義奉神神位出言信處

四主類為廢在案為新條影石名新街史以按云天得民

東直門外大街
順天府府志卷之四十五

永

宋賢事彙序

易曰。君子多識前言往行。以畜其德。聖門狂者。動稱古之人。古之人。夫古人豈異人哉。以今人不若古人。而始見古

人之為高。然今人未嘗不可
為古人也。而不能者。志不狂
若也。志之不立。終其身汨沒
於聲利之場。案頭所置。不離
乎朝報仕籍。學彌荒。氣彌俗。

究其所就。不過顯廩。舉千秋
大業。以博區區。亦可惜已。余
佩仕優。則學之訓。每以暇日
觀史。因見宋世風人材。頗類
今日。其言論行事。徃徃有可

為今日用者。因采而彙之。蓋
吾方寸中。元有古人。如穀之
種。木之根。不溉不滋。不培不
發。是編。固所以溉之培之之
助也。顧余又聞先正論讀書。

云讀得一尺。不如行得一寸。
夫庖人烹割。而不自飲食。優
人唱談。竟日。曲本而已。傭書
者。矻矻筆石間。於書無與也。
有如讀書而不能用。遇事臨

時曾不見其得力。與庖人優
人傭書何異。余既謝事老矣。
然一二尚可勉者。何敢不勉。
晉江李廷機序

吳諸生薛明益書

才賢事彙目錄

卷之上

誠實

廉介

澹泊

寡嗜欲

恬退有守

遠器

氣度

雅量

識見

公正

執持

擔當

識體

慎重

凝定

鎮靜

薦擢

處事

應猝

卷之下

政事

荒政

紀綱

講筵

言事

聞望

忠厚

仁德

義事

恭謹

辭讓

素位

出處

言語

處人

韜晦

忘怨

處困

交情

家教

田宅

導生

生計

兵事邊事

宋賢事彙目錄

終

朱賢事彙卷之上

明

資善大夫禮部尚書兼東閣大學士李廷機

彙集

都察院右僉都御史巡撫應天徐民式 校政

直隸蘇州府

長洲縣知縣胡士容

同校

吳縣知縣袁熙臣

誠實

劉元城先生安世自言從學於司馬溫公嘗問
行已之要可以終身行之者公曰其誠乎問行
之何先曰自不妄語始安世力行斯訓平生只

是一箇誠。縱橫左右無所不通。其樂無窮。任怎生也動安世不得。

王沂公曾嘗曰。昔楊文公有言。人之操履無如誠實。吾每欽佩斯言。苟執之不渝。夷險可以一致。

東萊呂氏祖謙曰。當官處事。但務着實。如塗擦文書。追改日月。重易押字。萬一敗露得罪。反重。亦非事君不欺之道也。又曰。百種奸僞。不如一實。

魏公琦平生無僞飾其語言其行事進立於朝與士大夫語退息於室與家人言一出於誠門人或從公數十年記公言行相與反復考究無一不相應。

寇萊公準年十九舉進士時太宗取人多問其年年少者往往罷遣或教公增年公曰吾初進取可欺君耶。

真宗封泰山駕發京師詔百官蔬食禮畢上勞從官曰卿等久食蔬矣王旦等皆再拜馬知節

獨言蔬食者唯陛下。一人。旦等在道與臣同次。舍無不私食肉者。於是旦等皆再拜謝曰。誠如知節之言。

仁宗在東宮。魯簡肅公宗道爲諭德。其居側有酒肆。一日公微行飲其中。適真宗急召公。中使及門。而公不在。移時乃自肆歸。中使遽先入白。與公約曰。上若怪公來遲。當託何事以對。公曰。但以實告。中使曰。然則當得罪。公曰。飲酒人之常情。欺君臣子之大罪也。中使嗟歎而去。具如

公對公見上問何私行公謝曰臣家貧無器皿酒肆百物具備適有鄉客來遂與之飲然臣易服人無識者上笑曰卿爲官臣恐爲御史所彈然自此奇公以爲忠實可大用

胡文恭公宿在審官刑院擇詳議官有在選中者嘗監征權以水災負課同列謂小累不足白公竟白而薦其才可用仁宗用之同列退謂公曰倘緣是不用奈何公曰彼之得失不過一詳議官宿平生以誠事主今白首矣忍毫髮欺乎

廉介

曹武惠王彬在周朝嘗使吳越郤其餽追至數程亦不受不得已籍上之宮世宗彊之受悉以分遺親舊不留一錢及事宋平蜀諸將王全斌等多取子女玉帛武惠歸橐中惟圖書衣裳而已太祖以全斌等屬吏授武惠宣徽南院使義成軍節度使武惠辭太祖曰卿有茂功又不矜伐設有微累全斌等豈惜言哉可無讓

沈僕射倫從伐蜀諸將競取玉帛子女公獨居

宋史 卷一百一十五 四
佛寺飯蔬食有以珍異獻者皆拒之東歸篋中
纔圖書數卷而已太祖知之以公爲戶部侍郎
樞密副使

范太傅質以廉介自持未嘗受四方問饋所得
祿賜多給孤遺食不異品身歿家無餘貲後太
祖因論相謂侍臣曰朕聞范質但有所居宅不
營產真宰相也

劉中丞公溫叟太宗爲開封尹時聞其清介遣
吏遺錢五百千受之貯廳西舍令吏封識而去

明年重午送角黍紈扇所遣吏卽送錢者視西
舍封識宛然還白太宗太宗曰我送猶不受況
他人乎命輦歸府中他日侍宴具道其事太祖
歎賞久之卒用爲御史中丞

王學士禹偁嘗草李繼遷制繼遷餽馬五十匹
爲潤筆公却不納及出守滁閩人鄭褒來謁公
買一馬贈之或言其虧價太宗曰彼能却繼遷
五十匹顧肯虧價哉

向文簡公敏中判大理寺時沒入祖吉贓分賜

法吏公引鍾離意委珠事獨不受知廣州自市

南藥以往在官一無所須

按漢交趾守張恢墨敗籍其貨詔賜臣下

尚書鍾離意得珠悉以委地曰獲物不敢拜明帝歎曰清平尚書之言

向文簡公敏中太宗嘗書其名付中書將大用

當塗者忌之會有言公在法寺時皇甫侃以賊

敗發書歷詣朝貴公亦受之者事下御史按實

嘗有書及門不啓封遣去俄捕得侃僮詰之云

書納箚中瘞臨江傳舍馳驛掘得封題如故太

宗大驚異召見賞激未幾拜右諫議大夫同知

樞密院事自郎中至是百餘日起擢如此

包孝肅公拯知端州端貢硯前守率私取數十
倍公命製但足貢額及歸不持一親家訓云後
世子孫仕宦有犯賊者不得放歸本家亡歿之
後不得塋於大塋之中不從吾志非吾子孫刻
石豎於堂壁

蔡學士襄嘗書小吳箋云李及知杭州市白集
一部乃爲終身之恨此清節可爲世戒張乖崖
鎮俗當遨遊時士女環左右終三年未嘗回顧

此重厚可爲薄末之檢押。

唐質肅公介謫倅潭州時有賈匿珠爲關吏按出太守而下悉輕估買之事發仁宗謂近侍曰唐介必不買覽奏果然

龍圖閣直學士陳公從易自廣州罷還不蓄南物獨載俸餘錢過嶺仁宗聞之曰此其清節過馬援矣擢知制誥

石徂徠先生介寓學南都王瀆聞其勤約因會客以盤餐遺之先生謝曰甘脆者亦介之願也

但日饗之則可。若止得一餐。明日何以繼乎。朝餐膏粱。暮厭粗糲。人之常情也。余所以不敢當賜。便以食還。王咨重之。

蘇丞相頌云。平生薦舉。不知幾何人。惟孟安序朝奉。分寧人。歲以雙井一斤爲餉。知吾無苞苴之饋也。

歐陽文忠公修與其姪通理書云。昨汝書中言欲買朱砂來。吾不闕此物。汝於官下宜守廉。何得買官下物。吾在官所。不曾買一物。可觀此爲。

戒也。

吏部郎中畢公仲游字公叔文簡公士安曾孫也。嘗以開封推官出提點河東路刑獄。太原銅器名天下。獨不市一物。懼人以爲矯也。且行買二茶匕而去。時故相韓縵在太原。按視列郡。謂人曰。如公叔可謂真清矣。

周濂溪先生敦願嘗得疾。更一晝夜始甦。友人潘興嗣視其家服御之物。止一敝篋。錢不滿數百。

劉祕書丞恕家貧一毫不妄取其自洛陽南歸時已十月無寒具司馬溫公以衣襪及舊貂褥責之固辭強與之行及潁川悉封返。

范侍郎育在神宗朝嘗作庫官隨行箱籠只置

廳事前以防疑謗。

庫官想亦不久更替如今銀庫之差若任之久亦不能

曾中書公鞏在官有所市易取價必以厚予價必以薄門生故吏以幣交者一無所受福州無職田歲鬻園蔬收其直常三四十萬公曰太守與民爭利可乎罷之後至者亦不復取

程伊川願見韓侍郎維於穎川韓館之一日密謂其子彬叔曰先生遠來有一金藥標似可爲先生壽未敢遽言之汝待食從容道吾意彬叔如戒啓之伊川曰願與乃翁道義交故不遠而來奚以此爲詰朝遂歸持國曰我不敢言正爲

此耳

持國謂韓維字

呂汲公大防以百縑遺伊川先生辭之時族子在旁勸先生勿爲已甚先生曰公所以遺我者以我貧也公爲宰相當使天下受其賜天下貧

者衆矣。公帛固多。恐不能盡周也。

陳無已師道家貧。或經日不炊。妻子慍見弗恤。傳欽之侍郎求介。秦觀見之。知其貧。懷金以餽。及至。觀其貌。聽其論議。竟不敢出口而去。與趙挺之友。壻素惡其人。適預郊祀。寒甚。衣無綿。妻就假趙家。問所從得。却不服。遂以寒疾死。

中書舍人潘公良貴。廉介自持。所居僅庇風雨。郭外無尺寸之田。經界法行。獨以丘墓地輸帛數尺而已。常誦三戒之言。而深以在得一戒痛。

自儆省。

胡文定公安國轉徙流寓至於空乏然貧之一字絕口不道。嘗語子弟曰對人言貧者意將何求。張忠定公詠亦嘗曰廉不言貧。

辛簡穆公次膺雖貧不自聊。一豆羹不妄受。高宗嘗面諭之曰卿廉聲著聞士大夫言卿在閔中不受俸公對曰臣爲貧而仕豈有辭俸之理。但不當受者不敢受。上曰使人人似卿天下何患不太平耶。上又曰朕知卿如在家僧名利聲。

色人所好者卿皆不好

澹泊

胡文定公安國曰人須是一切世味淡薄方好。不要有富貴相。聞明道先生一見呂微仲大防便曰宰相呂微仲須做只是這漢子俗。謝上蔡顯道云爲他有富貴相便是俗處。王介甫安石在政事堂只喫魚羹飯。因薦兩人不行便乞去。云世間何處無魚羹飯爲他緣累輕便去住自在。嘗愛諸葛孔明當漢末身都將相手握重兵何求不得何欲不遂却與後主言成都有桑八

百株薄田十五頃子弟衣食自有餘饒臣身在外別無調度不別治生以長尺寸死之日不使廩有餘粟篋有餘帛以負陛下及卒果如其言如此輩人真可謂大丈夫矣。

李文定燾曰仕宦至卿相不可失寒素體君子無人不自得者正以磨挫驕奢不至居移氣養移體也。

張文節公知白仁宗朝在相位自奉養如爲河陽掌書記時或言公自奉若此外人頗有公孫

布被之譏。公歎曰。吾今日雖舉家華衣美食。何患不能顧人情。由儉入奢易。由奢入儉難。吾儻豈能常有身。豈能常存。一旦異於今日。家人習奢已久。不能頓儉。必至失所。豈若吾居位去位。身存身亡。如一日乎。

杜祁公衍家食惟一麪一飯。或美其儉。公曰。衍本一措大耳。爵祿服用。皆國家者。一旦奪之。却爲一措大。又將何以自養耶。

曹武惠王彬在周朝爲晉州都監。一日與賓從

還坐於野、會隣道守將馳書遣使至、使問孰爲監軍、有指以示之、使疑爲給、已笑曰、豈有國戚近臣而衣弋綈袍坐素胡床者乎。旣而方信。

王沂公會奉身儉約、每見家人華衣、卽瞑目曰、吾家素風一至如此、故家人一衣稍華、不敢令公見。一日有同年孫冲子京來辭、公飭子弟云、留孫京啐飯、安排饅頭、饅頭時爲盛饌也、食後合中送數軸簡紙、開看皆是他人書簡後截下紙、其儉如此。

韓忠獻公億布衣時與李康靖公若谷同遊共
寢一氈及分途割而分之至汝州州守趙延康
靖於館尤敬待韓公每至設肉康靖嘗有簡戲
韓云久思肉味請君早訪及康靖知長社縣日
懸百錢於壁用盡卽已

范文正公仲淹少與劉某同讀書長白山日煮
粥一器經宿遂凝畫爲四塊早晚取二塊斷齏
十數莖蘸汁半盂入少鹽嗜之如此者三年公
爲吏部員外郎時有三婢及出守歷兩府以至

於薨不增一人亦未嘗易也。子純仁娶婦或傳婦以羅爲帷幔公不悅曰羅綺豈帷幔之物敢持至當火於庭。

蘇東坡軾在黃州飲食不過一爵一肉有尊客盛饌則三之可損不可增有召者預以此告之其言曰一安分以養福二寬胃以養氣三省費以養財。謫齊安每月朔取錢四千五百斷爲三十塊掛梁上日用一塊一百五十文仍以竹筒貯餘錢以待賓客。

仇泰然愈大觀間知明州愛一幕官欲薦之一
日問君日費幾何對以十口之家日用千錢泰
然驚曰吾爲郡守費不及此屬僚所費倍之安
得不貪遂不薦自是見疎。

張子韶九成云余平生貧困處之亦自有法每
日用度不過數十錢至今不易也鄭亨仲在萊
陽亦日以數十錢懸壁間椒桂葱薑約一二錢
曰吾平生貧苦晚年登第稍覺快意便成奇禍
今學張子韶法要見舊時齏鹽風味可長久也

寇萊公準在鄧州造花蠟燭天下有名雖京師不能造公少年富貴好夜飲雖寢室亦然燭達旦廁溷間燭淚成堆杜祁公衍在官未嘗然官燭油燈一炷熒然欲滅與客相對清談而已二公皆名臣奢儉不同然祁公壽考終吉萊公晚有南遷之禍雖其不幸亦可以爲戒也

呂正獻公公著嘗書古人詩於屏風云好衣不近節士體梁穀似怕腹中書

司馬溫公光曰先公爲郡牧判官客至未嘗不

置酒或三行或五行不過七行酒沽於市果止梨栗棗柿殽止脯醢菜羹器用瓦漆當時士大夫皆然會數而禮勤物薄而情厚近日士大夫家酒非內法果非珍異食非多品不敢會賓友嘗累日營聚然後發書苟或不然人爭非之以爲鄙吝嗟乎風俗頽弊如是居位者雖不能禁忍助之乎。

寡嗜欲

呂文穆公蒙正爲相一朝士家藏古鏡自言能照二百里因公弟獻之公曰吾面不過楮子太安用照二百里

有貨玉帶於王文正公旦弟以呈公公曰如何弟曰甚佳公命繫之曰還見佳否曰繫之安得自見公曰自負重而使觀者稱好無乃勞乎故平生所服止賜帶

孫侍讀公甫人嘗餽一硯直三十千公曰何貴

也客曰硯以石潤爲貴此石呵之水流公曰京師一檐水繞直三錢要此何用竟不受

程伊川先生頗在經筵一日承受張茂則招講官啜茶觀畫先生曰吾平生不啜茶不識畫竟不往

張文節相公知白夫人朝莊獻太后見其二侍婢老且陋敕夫人爲公市少婢一日公歸見二妹駭問夫人具以太后之指告公指二老婢謂夫人曰此夫人之媵出無所歸固當終身于此

若二妹年未踰笄。將嫁少年子。向去之事固不可知。而令守一老翁。甚無謂也。雖太后聖慈。然其固不欲。他日入見。宜以此奏。遽召二妹父兄還之。并衣飾爲嫁資。謂曰。若更僱人。必送府勘罪。

王荆公安石夫人爲買一妾。公見之曰。何物女子。曰。夫人令執事左右。曰。汝誰氏。曰。妾之夫爲軍大將。部運失舟。賣妾以償。公默然曰。夫人用錢幾何。曰。九十萬。公遽還其夫。盡以錢賜之。

司馬溫公光爲太原府通判未有子夫人爲買一妾公殊不顧夫人疑有所忌也一日夫人出教其妾自飾至書院中公訝曰夫人出汝安得至此亟遣之。

張忠定公詠知益州時當王均李順之亂仕蜀者多不挈家公單騎之官屬吏憚公嚴莫敢畜婢妾公因置一婢自此屬吏亦稍稍置及將還闕呼婢父母出貲嫁之仍室女也。

張忠定公詠室中無侍婢及玩物間如也門人

李旼謂公寢室禪室不如

蘇東坡軾稱范忠文公鎮平生不好佛。晚年減節嗜欲。一物不芥蒂於心。却是學佛作家。

恬退有守

顏氏家訓曰。君子當守道待時。世見躁競得者。便謂弗索何獲。不知時運之來。不求亦至矣。見靜退未遇者。便謂弗爲胡成。不知風雲不興。徒求無益也。凡不求而得者。焉可勝算乎。

謝上蔡先生顯道嘗言。萬事有命。人力計較不得。平生未嘗干人。在書局亦不謁執政。或勸之對曰。他安得陶鑄我。自有命在。若信不及。風吹草動。便生恐懼。枉做却閒工夫。枉用却閒心力。

信得命及便養得氣不挫折。

范忠文公景仁貢院奏名皆第一。故事殿庭唱第過三人則爲奏名之首者。抗聲自陳必擢置上列。以吳春卿育歐陽永叔之耿介猶不免從衆。公獨不自陳。同班屢趣不動。至七十九名唱及出拜。退就列。訖無一言。衆皆服其安恬。自是始以自陳爲耻。

韓持國維執政億子也。以進士薦。禮部不就廷試。乃以父任守將作監主簿。丁外艱服除。闔門

不仕。仁宗患縉紳奔競。諭宰相以旌擢恬退之人。則躁求者自當知耻。於是文潞公彥博等舉公召試學士院。辭不赴。除國子監主簿。

呂正獻公公著既中第。詔錄呈所業。將召試館職。公謙避終無所進。朝廷知其意。不復索。令徑就試。亦不赴。仁宗心重之。及領南曹。因引選人對便殿。帝謂公曰。知卿恬退。有顏氏之節。范忠宣公純仁作相。其子正平當入遠。公欲以恩例換近地。正平堅不肯。前人立志如此。

鄭介夫俠治平中隨父官江寧王荆公聞其苦
學邀與相見稱獎之中進士高第調光州司法
參軍有疑獄讞議傳奏荆公在政府悉如其請
介夫感爲知己秩滿入都時初行試法之令試
中者超京官介夫以未嘗習法辭三往見之問
所聞對曰青苗免役保甲市易數事與邊鄙用
兵在俠心不能無區區也荆公不答介夫不復
見但數以書言法之爲民害者久之監安上門
荆公欲辟爲檢討令其客黎東美諭意介夫曰

讀書無幾不足以辱檢討。所以來求執經相君門下耳。而相君發言持論無非以官爵爲先。所以待士者亦淺矣。果欲援俠而成就之。取其所獻利民便物之事。行其一二。使進而無愧。不亦善乎。

呂原明公希哲正獻公子也。以蔭入官。父友王荊公勸其勿事科舉。遂絕意進取。荊公爲政將使其子雱爲講官。以公有名。欲先用之。公辭曰。辱公相知久。萬一從仕。將不免異同。則疇昔相

與之意盡矣。荆公乃止。正獻作相，二弟已官省寺，公猶滯筦庫。久乃判登聞鼓院，力辭。正獻歎曰：「當世善士，吾收拾畧盡，爾獨以吾故置不試，命也。」母夫人聞，正獻言，笑曰：「是亦未知其子矣。」陳無已師道游京師，未嘗一至貴人之門。章惇在樞府，屬秦觀延致之。答曰：「師道於章公前有貴賤之嫌，後無平生之舊。若昧冒法義，聞命走門，則失其所以見招。公何取焉？」及惇爲相，又致意，卒不往。

海待制良貴以上舍釋褐爲辟雍博士遷秘書
郎時宰相蔡京方以爵祿釣知名士親故數爲
京致意良貴正色謝絕高宗朝除考功郎遷左
司宰相呂頤浩從容謂曰君名士也旦夕欲以
兩省處君良貴正色對曰親老方欲乞外兩省
官非良貴可爲也退語人曰宰相進退一世人
才以爲賢耶自當擢用何可握手密語先示私
恩若士大夫受其牢籠何以立朝卽日乞補外
知嚴州到官兩月遂請祠良貴剛介清苦爲博

士時主黼張邦昌俱欲妻以女拒之晚家居貧甚秦檜諷令求郡良貴曰從臣除授例合辭免今求之於宰相辭之於君父良貴不敢爲也

呂許公夷簡聞包拯才一日見班次有其名頗喜及歸問其居同巷又喜欲見之無幾報拯朝辭乃就部注一知縣而出公奇之遂薦對除裏行自此擢用

樞密直學士陳公巖叟知安喜縣時有詔近臣舉御史舉者意屬公而未及識或謂可一往見

公笑曰此所謂呈身御史也。卒不見。及哲宗卽位，用劉摯薦爲監察御史。

蘇丞相公頌自言平生未嘗以私事干人。呂惠卿參政，使其親友謂公曰：「子容吾鄉里丈人行，若從吾言，執政可得也。」公笑而不答。

張忠簡公闢爲校書郎，久次喜論事。秦檜一日微諷公謂當入臺，公曰：「丞相苟見知，老死祕書足矣。」檜默然。

都水丞劉夔於曾魯公公亮同鄉，公嘗謂之曰：

久知都官治狀。屢欲進擢。然議論有所未合。姑少遲之。吾終不忘也。劉曰。士之淹速。詘伸。亦皆有命。今姓名已蒙紀錄。而尚屈於不合之論。亦夔之命矣。公歎曰。比來士大夫不免有求求而不得。卽多歸怨。而君乃引命自安。吾待罪政府行十年。未見如君者。

韓忠獻公琦監左藏庫。時方貴。高科多徑去爲顯職。公獨滯於筦庫。衆以爲非宜。公處之自若。職事亦未嘗苟且。

唐質肅公介由嶺南改知復州。未至召充言事御史。仁宗謂公曰：知卿被謫以來，未嘗有書至京師，可謂不易所守。

劉元城先生安世建中間自嶺外歸。至宣和間，內侍梁師成得幸貴震一時，欲釣致公，引公大用。因人以書抵公，公謝曰：吾廢斥幾三十年，未嘗有一點墨與當朝權貴。吾欲爲元祐完人，不可破滅，還其書不答。

范蜀公鎮不爲人作薦書。有求者不與，曰：仕宦

不可廣求人知受恩多則難立朝矣。

遠器

王沂公曾狀元及第還里郡守命父老鼓樂迎於郊公易服單騎由他門入遽謁守守驚曰已遣人奉迎門司何爲未報公曰不才叨忝豈敢重煩父老相迎守歎服以爲遠器

韓魏公琦徙開封府推官理事不倦暑月汗流浹背府尹王博文大器重之曰此人要路在前而治民如此真遠器也

丞相龐公籍初登第爲郡掾郡守好責人小禮

每令掾屬羅拜庭下而已。坐受衆皆忿罵。公獨處之自若。曾當庭叅偶大雨。守命張傘布茅於庭。公拜起唯謹。此亦公遠到之量也。

傅獻簡公堯俞歷臺諫。遷三司鹽鐵副使。出知江寧。坐事落職。監衛州黎陽倉草場。郡掾行縣。公出迎拜謁甚恭。郡守檄他官代出納。公不可。雖祁寒隆暑必坐庾中治事。不少懈。

氣度

趙忠獻王普嘗薦某人爲某官太祖不許明日復奏亦不許明日又以其人奏太祖怒碎奏牘擲地忠獻顏色不變跪拾以歸他日補綴舊牘復奏如初太祖卒用其人

忠獻在中書呂正惠公端爲叅政忠獻謂人曰吾嘗觀呂公奏事得嘉賞未嘗喜遇抑挫未嘗懼不形於言真台輔之器

呂文穆公蒙正爲相時知州張紳坐贓免或言

紳賊不實。蒙正貧時。句貸不如意憾之耳。太宗命復紳官。公不辯。後考課院廉得紳狀。黜爲團練副使。公再入相。太宗謂曰。紳果有賊。公不辯。亦不謝。

真宗出喜雨詩示二府主文正公。旦袖歸。謂同列曰。詩誤一字。莫進入。改却。王欽若曰。此亦無害。欽若退。密奏之。翌日上。謂公曰。昨日詩有誤字。何不奏來。公叩謝曰。臣昨得詩。未暇再閱。有失。奏陳。不勝惶懼。諸公皆謝。獨樞密馬知節不

謝具以實奏上顧公笑

王沂公曾罷叅政往候王文正公旦王已疾困辭弗見顧其壻范曰王君他日勲業甚大昨以避讓會靈使領拂上意而進退詳雅詞直氣和了無所懾始被進用而能若是僕在政府幾二十年每進對忤意卽蹶躄不能自容以是知其偉度

雅量

呂文穆公蒙正叅知政事初入朝堂有朝士指之曰是子亦叅政耶公佯爲不聞而過之同列欲詰其人公止之時皆服其雅量

李文靖公沆爲相有狂生叩馬上書訴其短公謝曰俟歸詳覽生怒隨公馬後肆言曰居大位不能康濟天下又不能引退寧不愧於心乎公馬上蹴踏再三曰屢求退以主上未賜允耳

王文正公旦每薦寇萊公準而寇數短公一日

真宗謂公曰卿雖稱準準不稱卿也公曰臣在位久闕失多準對陛下無隱益見其忠直此臣所以重準耳上由是益賢公先是公在中書寇在密院中書偶倒用印密院勾吏行遣他日密院亦倒用印中書吏亦呈行遣公問汝等且道密院當初行遣是否曰不是公曰既不是不要學他不是公有弟傲不可訓嘗祠家廟庭列百壺弟皆擊破酒流滿地公自外來不問但攝衣步入後弟悔改終亦不言家人欲試其量一日

用飯以少埃墨入羹中、公但啖飯。家人問何不食羹。曰我偶不喜肉。一日又墨其飯。公曰吾偶不喜飯。可具粥。

韓魏公琦初與同館王拱辰御史葉定基同閱試卷、二人時有喧爭、公安坐如不聞。拱辰忿不助已、詣公舍謂公曰此中習宰相器度耶。公謝之。其爲陝西招討時尹師魯與夏英公不相下、師魯見公論英公、英公亦論師魯、公皆納之。不形於言。在政府與歐陽公共事、歐公見人

有不中理者輒峻折之故人多怨公則從容諭之以不可之理而已未嘗峻折之也凡人語及所不平氣必動色必變辭必厲唯公不然更說到小人忘恩背義欲傾已處辭和氣平如道尋常事劉元城先生安世言公與文潞公彥博俱嘗鎮北門方魏公時朝城令決一隸兵方二下輒悖罵不已令以解府魏公問汝罵令信否曰乘忿實有之公曰安可如此卽於解狀判赴市曹處斬畧不變色衆但見其投筆方知有異

至潞公時有外鎮解一卒潞公震怒亦判處斬
以此見二公之量不同公家有二玉杯甚佳
一日宴客置卓上爲一吏偶觸碎吏伏地請罪
公笑謂客曰凡物成毀亦自有數俄顧吏曰汝
誤也非故也神色不動客皆歎服又嘗夜作
書令一侍兵執燭忽他顧燃公鬚公遽以袖摩
之作書如故少頃回視已易一兵公恐主吏鞭
之亟呼曰勿易渠今已解執燭矣其量如此
狄武襄公青作真定副帥嘗宴韓魏公以處士

宋賢事彙 卷之上

三

言六

劉易習於魏公亦與宴易性疎狂優人以儒爲戲易勃然謂黥卒敢如此詬詈不絕口至擲樽俎以起公氣自若不少動笑語益溫詰朝造劉謝之魏公服公有量

識見

李文靖公沆爲相。王文正公旦叅知政事。時西
北用兵。或至盱眙。食。文正歎曰。我輩安能坐致太
平。優游無事耶。文靖曰。少有憂勤。足爲警戒。他
日四方寧謐。朝廷未必無事。文靖曰。取四方水
旱盜賊奏之。文正以爲細事。不足煩上聽。文靖
曰。人主少年。當使知四方艱難。不然。血氣方剛。
不畱意於聲色犬馬。則土木甲兵禱祀之事。作
矣。吾老不及見。此叅政他日之憂也。及文正親

見王欽若丁謂等所爲欲諫則業已同之欲去則上遇之厚乃歎曰李文靖真聖人也

慶曆中劫盜張海過高郵知軍晁仲約度不能禦諭民出金帛牛酒勞之海乃逕去時范文正公仲淹在政府富鄭公弼在樞府富公請誅仲約言高郵民欲食其肉范公曰郡縣兵械誠足戰守遇賊不禦而反賂賊此法所誅今高郵倉卒無備小民得醪出財物免殺掠必喜而云欲食其肉傳者過也仁宗從范公言貫仲約富公

惺曰。當今患法弛。方欲舉法。而公沮之。何以整
衆。范公密告曰。祖宗以來。未嘗輕殺臣下。此盛
德事。吾與公在此。同心者有幾。雖上意亦未知
所定。而輕導以誅戮。他日手滑。雖吾輩亦未敢
自保。富公終不以爲然。及二公迹不安。范公出
按陝西。富公亦出按河北。還及國門。不得入。竟
夜徬徨遶床。歎曰。范六丈聖人也。

太宗真宗嘗獵於大名之郊。賦詩數十篇。賈魏
公刻石藏班瑞殿。韓魏公琦畱守日。有勸募進

宋史卷之二十一
者公曰修之可也安用進爲韓絳來遂進之公
聞歎曰昔豈不知進耶顧上方銳意四夷事不
當更導之爾

祚符中王沂公曾在掖垣時瑞應沓臻公嘗請
對真宗語及之公奏曰斯誠國家承平所致然
願推而勿居異日或有災沴可免輿議退又以
白執政及後飛蝗旱暵上思公言遂被擢用
祥符中天下大蝗真宗使人於野得死蝗示大
臣明日有神死蝗請稱賀者王沂公曾獨以爲

不可。後數日，方奏事。飛蝗蔽天。真宗顧公曰：「使百官方賀，而蝗如此，豈不爲天下笑？」

趙元昊反，有詔削奪元昊官爵，募能生擒者，斬首者，擢節度使，賜錢萬貫。呂文靖公夷簡時在，大名聞之曰：「謀誤矣！」立削奏曰：「前代方鎮叛命，如此誥誓，則有之，非所以御戎狄也。」萬一不遜，得無損國體乎？朝廷方改之，已聞元昊有指斥之詞矣。」

富鄭公弼知諫院。康定元年，正旦日食，公請罷

宴徹樂契丹使人亦止就館賜飲食不設宴執
政以爲不可公曰萬一虜主行之不爲朝廷羞
乎後使契丹者還云虜中罷宴仁宗悔之

徽宗初欲革紹聖之弊衆議皆以瑤華復位司
馬溫公等叙官爲所當先馬忠肅公亮時在諫
省獨以爲幽廢母后追貶故相彼皆立名以行
今欲正復當先辯明誣罔昭雪非辜誅責造意
之人然後發爲詔令以禮行之庶無後患朝廷
以公論久鬱欲快人情遽施行之至崇寧間蔡

京用事悉改建中之政人乃服公識見

陳忠肅公雍在通州張商英入相欲引公自助時置政典局乃自局中奉旨取公所著尊堯集蓋將由史局用公也公料其不能成事辭以修寫未發得旨催促公乃用奏狀進乞於御前開拆或謂公當徑申局中而通書廟堂公曰宰相有所施爲不於三省公行乃置局建官人將疑而生忌遠其迹猶恐不免况通書耶繼而張罷黜公亦有台州之行責詞謂公私送尊堯集與

卷之二
三
崇商英於是人服公識見云

石守道編三朝聖政錄質之韓魏公公指數事
可去其一太祖惑一宮褻視朝宴羣臣有言太
祖悟伺其酣寢刺殺之公曰此豈可爲萬世法
石乃去之以進

公正

諫議大夫張師德兩詣王文正公旦門不得見
意爲人所毀以告向公。敏中向公從容言之。文
正曰。旦處安得有毀人者。但師德後進待我薄
耳。及議知制誥。文正曰。可惜張師德。向公問之。
文正曰。累於上前言師德名家子。有士行。不意
兩及吾門。狀元及第。榮進素定。但當靜以守之。
耳。若復奔競。使無階而入者。當何如也。

王沂公曾當國。一朝士與公有舊。欲得齊州公

以齊州已差人與廬州不就曰齊州地望卑於廬州但於私便耳相公不使一物失所改易前命當亦不難公正色曰不使一物失所惟是均平若奪一與一此一物不失所則彼一物必失所其人慚沮而退起居舍人尹洙初入館編校四年復欲得一差遣至中書見公援錢延年例公徐曰學士自待何爲在錢延年例耶尹終身以爲愧馬季良聯姻劉氏太后欲擢季良龍圖閣待制顧公守正難之會公移疾諭二執

政樞季良且曰王曾在告可亟行之諸公承順
季良遂以太常丞充職中外誼傳而公持正之
名益著

王武恭公德用有故人爲人干進公間所遺幾
何出金謝之

晏公敦復素剛嚴及居吏部請謁不行親故有
以書至視其封題有并及同字者卽却之惟務
抑僥競清流品區別賢否一時銓綜號爲平允

執持

太祖事世宗於澶州曹彬掌茶酒太祖嘗從求酒彬曰此官酒不敢相與自沽酒以飲太祖太祖重之及卽位委以心腹

太祖下滁州世宗命竇儀籍其帑藏太祖遣親吏取藏絹儀曰公初下城雖傾藏取之誰敢言者今既有籍卽爲官物非詔旨不可得也後太祖屢對大臣稱儀有守

包孝肅公拯立朝剛毅人皆憚之謂其笑比黃

河清京師爲之語曰。關節不到。有閻羅包老。

杜祁公衍執政。凡內降恩。一切不與。每積至十數。則封還之。仁宗嘗謂諫官歐陽修曰。外人知杜衍封還內降耶。有求恩澤。朕以杜衍不可告之而止者。多於所封還。外人及衍皆不知也。公嘗戒門生曰。天下惟浙人褊急。易動柔懦。少立衍。自仕幕府。至監司。人尚不信。及爲三司副使。累於上前有所執奏。人曰。杜衍如是。莫非兩浙生否。其輕吾黨也如此。

公獨糾察在京刑獄時有僞牒爲僧者事
乃堂吏爲之開封按餘人而不及吏公白執
政請以吏付獄執政指其坐曰公卽居此無爲
近名公正色曰必得吏乃止

熙寧三年傳獻簡公堯俞服除至京師王安石
素善公謂公曰舉朝紛紛今幸公來已議以待
制諫院奉還矣公謝曰息甚厚但恐與公所謂
新法者相妨耳且爲言新法之不善安石不悅
乃以公爲直昭文館權同判流內銓

周濂溪先生敦頤爲南安軍司理叅軍有囚法不當死轉運使王逵欲深治之逵酷悍吏也先生與之辯不聽乃委手版將棄官去曰殺人以媚人吾不爲也逵悟囚得免

晏公敦復爲吏部侍郎時秦檜力贊和議用勾龍如淵莫將施廷臣爲臺官令擊去異論者公言和議不可從如淵等不可用爭之甚力檜使客諭公能曲從兩地旦夕可至公曰吾終不爲身計誤國家况吾薑桂之性到老愈辣請勿言

檜卒不能屈

張忠定公燾爲吏部尚書時監察御史施廷臣擢侍御史府丞莫將賜出身超拜起居郎皆迎合秦檜者公執奏故事遷除未有如此之驟力詆兩人引疾臥家檜素厚公使妻紹問疾且以翰苑許之公曰進退在我遷官則在他人燾惟有去耳檜語人曰張子公守正官職不能動也金人議和張公九成請以十事要金能從則與之和秦檜誘之曰且成檜此事又曰立朝須優

游委曲公曰未有枉已而能直人。

擔當

韓魏公琦處危疑之際。知無不爲。或曰。公所爲誠善。萬一嗟跌。豈惟身不自保。恐家無處所矣。公歎曰。是何言也。人臣盡力事君。死生以之。至於成敗。天也。豈可豫憂其不濟。遂輟不爲哉。公嘗言。臨事若慮得是。剗定脚做。更不移。成敗則任他。方可成務。又曰。琦每遇大事。卽以死自處。幸而不死。實天扶持。非琦所能也。公平日謂成大事在膽。往往自許。未嘗以膽許人。王丞相稱

公曰爲古人所未嘗任大臣所不敢

呂許公夷簡爲相契丹借兵伐高麗明肅太后
欲與之公執不可后曰適已微許其使矣不與
恐怨奈何公曰但以臣不肯拒之既而后語其
使曰意非不欲應但呂相公堅執不可耳使人
無語而去

文潞公彥博爲殿中侍御史時黃德和誣劉平
降虜賂平奴證之平家二百口皆械繫詔公置
獄於河中鞫治得實德和黨援盛謀翻其獄遣

他御史來公拒不納曰案具矣可亟還事或弗
成彥博執其咎德和并奴卒就誅及在中書與
樞密使龐籍議省兵所汰去及給半稟者合八
萬時論紛然謂必聚爲盜仁宗亦疑焉公曰今
公私困乏正坐兵冗脫有難臣請死之其策訖
行兵亦無事

呂惠穆公公弼夷簡子也神宗初爲樞密使時
議欲併環慶鄜延爲一路公曰自白草西抵定
遠中間相去千里若合爲一路猝有緩急將何

以應。又欲下邊。臣議之。公曰。廟堂之上。不處決。而諉邊吏。可乎。乃止。

吳正肅公育爲叅知政事。時章獻章懿太后升祔。真宗廟議者請覃恩優賜軍士。公曰。無事而啓僥倖。誰爲陛下建此議者。請治之。已而外人多怨執政。仁宗以語公。公曰。此必建議之人。欲動搖上聽。臣以身許國。何憚此耶。

范忠宣公純仁知慶州。秦中方饑。公發常平粟賑貸。僚屬請奏而須報。公曰。報至無及矣。吾當

獨任其責。

王居正知婺州。州貢羅萬匹。崇寧後增五倍。建炎中。減爲二萬。至是。主計者請復崇寧之數。居正力言于朝。戶部督趣愈峻。居正置檄不行。語其屬曰。吾願身坐。不以累諸君。呼吏爲文書付之。曰。卽有譴。以此自解。復疏五不可以聞。詔如建炎中數。

識體

范魯公質執政馮道輕其新進潛視所爲公初知印當判事語堂吏曰當判之事並施籤表得以視而書之慮臨文失誤道聞之服其識體

韓魏公琦爲相曾公爲亞相趙康靖歐陽文忠公爲叅政凡事該政令則曰問集賢該典故則曰問東廳該文學則曰問西聽至大事自決之人以爲得體

劉元城先生安世論本朝名相最得大臣體者
和賢事叢書卷之上

惟李沆如曰中外條陳利害一切報罷惟此少以報國此似失言然有深意蓋祖宗多經變故所立法度極是穩便卽不無小害而其利多後人不可輕變又如曰人主不可使一日不知憂懼若不知憂懼則無所不至矣此兩事最爲得體在漢時惟魏相能行此兩事。

宋元獻公庠爲叅政仁宗一日召二府至天章閣詔問天下利病宰相倉卒莫敢對公進曰臣等待罪二府不當下同諸生對策願至中書條

上人以爲得體

宋元獻公庠嘗奏事帶寬文書墜地不顧而行
仁宗呼內侍拾與之議者謂仁宗得人君體宋
公得大臣體

慎重

王文公珪嘉祐立皇子中書召公作詔公曰此大事非面受旨不可明日請對曰海內望此舉久矣果出自聖意乎仁宗曰朕意決矣公再拜賀始退而草詔歐陽公聞而歎曰真學士也呂文靖公夷簡爲相大內太百官晨朝而宮門不開輔臣請對仁宗御拱辰門百官拜樓下公獨不拜上使人問其故曰宮庭有變羣臣願一望清光上舉簾見之乃拜

凝定

向文簡公敏中除僕射。是日翰林李昌武當對。真宗謂曰。朕卽位以來。未嘗除僕射。敏中應甚喜。賀客必多。卿往觀之。昌武往門。無一人徑入。賀曰。聞降麻士大夫。莫不歡慶。公唯唯。又曰。自上卽位。未嘗除端揆。自非勲德隆重。眷倚殊越。何以至此。公復唯唯。又歷陳前世僕射勲得之盛。禮命之重。公亦唯唯。卒無一言。旣退。復使人問有無賓客飲宴。亦寂無一人。明日具以所見。

對上笑曰、向敏中大耐官職。

寇萊公準貶雷州、丁謂遣中使齎勅往授之、以錦囊貯劍、揭馬前、公方與僚官宴飲、驛吏言狀、公遣僚官出迎、中使避不見、入傳舍、久不出、問所以來不答、衆皆恐、公神色自若、使人謂中使曰、朝廷若賜準死、願見勅書、中使以勅授公、乃從錄事叅軍借綠衫、拜勅於庭、復宴飲至暮而罷。

陳忠肅公瓘以得罪蔡京、安置通州、又徙台州。

所過州郡令兵防送至台數月起遷人石慄知
州事慄至遣兵官突來禁公出入取責隣人防
守狀置邏卒巡察未幾攝公至郡庭大陳獄具
蓋朝廷取尊堯副本而慄爲此以怖之也繼又
幽公僧舍使小吏監守窘辱百端公安之不以
爲意慄亦終不能害

章惇蔡卞欲殺劉元城方竄廣東移廣西旣抵
廣西復徙廣東遠惡州軍無所不至及貶海州
忽有所厚士類數章惇屢勤之餘輒相向垂涕

公曰：豈非安世有後命乎？客曰：聞朝廷遣使來，將不利於公，願公自裁。無辱公，不爲動。海州有土豪，持厚資入京師，直以能殺公意達。惛除本路運判，馳至郡，將遣客勸公治後事。公色不動，畱客飲酒，談笑自若。對客書數紙，復呼其僕曰：聞朝廷賜我死，卽死，依此行，皆經紀其家，與同貶。當死者之家事也。俄報運判翌日至，家人益號泣，而公起居飲食如平常。夜酣寢，鼻息如雷。乃判官一夕嘔血死，公亦無喜色。

韓持國維罷門下侍郎出帥南陽已出國門程
子往見之子時在講筵公驚曰子來見我乎子
亦危矣程子曰只知履安地不知其危坐頃之
公不言子曰公有不豫色何也公曰雖無足道
所慮者貽兄姊之憂耳子曰領帥南陽兄姊何
憂公悟曰正爲定力不固耳

朱晦翁方與諸生講論有報褫職罷祠者先生
畧起視之復坐講如初辭色更爲和平翌日諸
生始知有指揮

呂正惠公端使高麗遇風濤檣折舟人大恐公恬然讀書若在齋閣中

程伊川先生願貶涪州渡江中流舟幾覆舟中人皆號哭先生正襟安坐如常已而及岸同舟有老父問曰當舟危時君獨不怖何也曰心存誠敬耳老父曰心存誠敬固善然不若無心先生欲與之言老父徑去不顧

鎮靜

趙忠獻王普爲相於廳事坐屏後置二大甕凡有人投利害文字皆置甕中滿卽焚之

李文靖公沆嘗言居位無補惟中外所陳利害一切報罷少以報國耳朝廷防制纖悉備具或徇所陳請施行一事卽所傷多矣

慶州軍亂神宗召二府入議文潞公彥博曰朝廷施爲以靜重爲先陛下厲精求治而人情未安者更張之過也祖宗法未必不可行但有廢

墜不舉之處耳

胡文恭公宿天資謹靜當大任尤顧惜大體羣臣方建言利害多更張公獨厭之曰變法古人所難不務守祖宗成法而徒紛紛無益於治也趙忠簡公再相踰月未見所施朝士或責之公曰今日事如久病虛弱之人再有所傷元氣必耗惟當靜以鎮之若大作措置煥然一新此趣死之術也

曹穆公瑋久在秦州累章求代真宗問王文正

公且誰可代瑋者、公薦樞密直學士李及上卽
以及知秦州、衆議皆謂及雖有行檢然非邊才、
楊億以告公、公不答、及至秦州將吏亦輕之、會
有禁軍白晝挈婦人銀釵於市中、吏執以聞、及
方觀書畧加詰問、其人服罪命斬之、復觀書如
故將吏驚服、不日聲譽達京師、億復見公稱公
知人、公笑曰禁軍爲盜主將斬之、烏得爲異政
乎、且之用及以曹瑋知秦州七年羌人讐服、邊
事已有成績及重厚必能謹守瑋之規模而已、

西南夷有妄言蠻賊儂智高欲來寇蜀者。攝守懼。調兵築城。朝廷亦發戍絡繹於道。促張文定公方平行。公言。南詔去蜀二千餘里。道險不通。其間皆雜種。不相役屬。安能舉大兵爲智高寇我哉。此必妄也。臣當以靜鎮之。道遇戍卒。輒遣還入境。下令曰。寇來吾自當之。妄言者斬。悉歸調兵。罷城役。會上元。城門通夕不閉。蜀乃大安。初。夏人講和。命韓魏公琦宣撫陝西。范公仲淹宣撫河東。范公請以兵從。仍益兵數萬屯守韓。

公以爲不必上前議未合旣退范公猶爭之韓公曰若爾則琦乞自行不用朝廷一人一騎范公色忿欲再請對韓公笑止之曾杜祁公衍富鄭公弼亦贊其說卒不發兵韓公嘗謂門人曰國家事鎮之則靜但敢者少爾如范公亦未免有易動處。

薦擢

呂文穆公蒙正夾袋中有冊子。每四方官員替罷謁見必問人材。隨即疏記分門類。有一人而數人稱之者必賢也。故所用多稱職以此。

虞公允文每言宰相無職事。旁招俊乂列於庶位而已。懷袖有小冊。目曰材館錄。聞人一善必書。再諭蜀薦汪應辰等六人。及爲相首用胡銓。張震洪适梁克家雷正等二十人。一時得人有元祐慶曆之風。

杜祁公衍在相位未期年而出嘗謂門人曰衍以非才久妨賢路遽得解去深遂乃心獨有一恨爾門人曰何也公曰衍平生聞某人賢可某任某人才可某用未能悉薦此所恨也。

程伊川一日與韓持國范夷叟泛舟於潁昌西湖有一官員來謁大資伊川謂有急切公事旣乃是求薦伊川云大資居位却不求人乃使人倒來求已。是甚道理。夷叟云只爲正叔太執求薦常事也伊川云不然只爲曾有不求者不與。

來求者與之遂致人如此持國便服

李文靖公沆爲相真宗問治道所宜先公曰不用浮薄新進喜事之人此最爲先問其人曰如梅詢曾致堯等是也終真宗世數人皆不用張忠定公詠所薦辟皆方廉恬退之士嘗曰彼好奔競者將自得之何暇吾舉

司馬溫公薦劉安世充館職因謂安世知所以相薦否安世曰獲從公遊舊矣公曰非也光居閒足下時節詢問不絕光位政府足下獨無書

此光之所以相薦也

李文正公昉爲相有求差遣見其材可用必正色拒之已而擢用或不足用必和顏溫語待之子弟問故公曰用賢人主之事若受其請是市恩也故峻絕之使恩歸於上若其不用者旣失所望又無善辭取怨之道也

王沂公會當國進退士人莫有知者范文正公仲淹乘間諷之曰明揚士類宰相之任公盛德獨少此爾沂公曰夫執政而欲使恩歸已怨將

誰歸。范公服其言。

韓魏公琦用人惟以公議所在。凡薦引於上前。未嘗輒漏其語。間因上宣諭。或同僚談說人始聞之。嘗曰。用人事。非人臣所得專。須還之主。上是則將順。非則開陳而已。

范忠宣公純仁在相位。薦引人材。必以天下公議所薦士。未嘗知出於公。公亦未嘗示恩意於人。

王文正公旦爲相。賓客見者無敢以私干。旣退。

公察其可與言及素知名之士數月後召詢四方利病因察其才其籍記其名自是不復見每有差除先密疏三四人請上點之同列皆莫知及奏入無不允者李行簡以將作監丞居于家一日真宗召行簡遷太子中允使者不知其居止命至中書問公人始知公薦行簡也公自知制誥至爲相薦士甚多及公歿修實錄得內出章奏乃知之公辭位時所薦十餘人其後不至宰相者李及凌策二人而已然亦皆爲名臣王

沂公曾嘗言公用人必先望實。或薦其賢則曰誠知此人。然歷官尚淺。人望未著。且俾養望。歲久不渝。而後擢任。則榮途坦然。中外允愜。故公執政亦遵行是言。

英宗欲用東坡知制誥。韓公琦曰。蘇軾遠大之器。他日自當爲天下用。要在朝廷培養。使天下士畏慕降伏。今驟用適足以累之也。上曰。且與修注如何。公曰。記注與制誥爲隣。未可遽授。不若且於館閣中擇近上貼職予之。乃授直史館。

東坡聞之曰公可謂愛人以德矣

仁宗以西事歎人才之乏杜祁公衍舊撫關中
薦長安布衣雷簡夫可任遽召對簡夫善敷奏
上嘉之令中書檢真宗召种放故事呂許公夷
簡言曰士大夫有口才者未必有實效莫若且
除一官徐觀其才能果可用擢之未晚上以爲
然除耀州幕官簡夫後累官至員外郎三司判
官而才實無大過人者

觀文殿學士范公宗尹言用人之法須擇可爲

執政者方除從官。可除從官者方除省郎。如是則選高而真才出。

程明道先生顯爲鄆令。當事者欲薦之。問所欲。先生曰。薦士當以才之所堪。不當問所欲。

崔公孺諫議大夫立之子。韓魏公夫人弟也。性亮直。喜面折人。魏公執政。用監司有非其人者。公孺曰。公居陶鑄之地。宜法造化爲心。造化以蛇虎者。害人之物。故置蛇於藪澤。置虎於山林。今乃置之通衢。使爲民害可乎。魏公甚嚴憚之。

處事

劉元城先生安世言嘗見馮文簡公京言昔與陳賜叔呂寶臣同任樞密賜叔聰明遇事迎刃而解而寶臣尤善秤停輕重凡事經寶臣處者人情事理無不允當秤停二字最吾輩處事所宜致力

蘇丞相頌曰韓非言爲木偶人者耳鼻欲大口目欲小蓋大則可小。小則可大處事亦然。不厭三思。

太宗大漸。李太后與宣政使王繼恩忌太子英明。陰與叅知政事李昌齡殿前都指揮使李繼勲。知制誥胡旦。謀立潞王元佐。太宗崩。太后使繼恩召宰相呂公端。公知有變。鎖繼恩於閤內。使人守之。而入太后謂曰。公車已宴駕。立嗣以長順也。今將如何。公曰。先帝立太子。正爲今日。今始棄天下。豈可遽違先帝之命。更有異議。乃迎眞宗於大行柩前即位。垂簾見羣臣。公平立。不拜。請捲簾升殿審視。然後降階。羣臣拜呼。

萬歲

歐陽文忠公修奏事錄云仁宗既連矢褒豫鄂三王更無皇子自至和三年正月得疾中外憂恐既而康復自是言者常以國本爲言輒畱中如此五六年嘉祐六年秋諫官司馬光知江州呂誨有疏仁宗曰朕有意多時矣但未得其人既而左右顧曰宗室中孰可韓公琦皇恐對曰此事豈臣下敢議當出自聖擇仁宗曰宮中養二子小者甚純然近不慧大者可也公遂啓何

名。仁宗卽道今上舊名曰二十歲矣。余等遂力贊之。明日奏事又啓之。仁宗曰決無疑也。余等奏言事當有漸。容臣等商量所除。實旣退。遂議且判宗正時。今上猶在濮王喪。乃議起復。來日將上。仁宗大喜曰如此甚好。二公與余又奏曰此事不可中止。乞斷在不疑。仍乞自內批出。仁宗曰此事豈可令婦人知。中書行可也。命旣出。今上再三辭避。至七年二月一日服除。堅臥稱疾。前後十餘護。余奏曰宗室自來不領職事。今

外人忽見擢用皆知將立爲皇子。不若正其名。緣誥勅降付閤門得以堅臥不受。若立爲皇子。只命學士作一詔書布告天下。事卽定矣。不由某受不受也。仁宗沉思久之。顧韓公曰。如此莫亦好否。韓公力贊之。遂降詔立爲皇子。凡所奏請皆余與西廳趙侍郎自書。其改名劄子余所書也。今上自在濮邸卽有賢名。及遷入內。良賤不及三十口。行李蕭然。無異寒士。有書數厨而已。

英宗固辭判宗正寺之命及立爲皇子復稱疾不入司馬溫公光疏言凡人于絲毫之利至相爭奪今皇子辭不貲之富至三百餘日不受命其賢於人遠矣然臣聞父召無諾君命召不俟駕使者受命不受辭皇子不當避使者不當徒反凡召皇子內臣皆乞責降且以臣子大義責皇子宜必入英宗遂受命

英宗以驚疑得疾遇宦官少恩兩宮遂成隙韓魏公琦慮有不測一日因對以危言動太后曰

臣等在外保護官家全在太后。若官家失照管，太后亦未安穩。太后驚曰：相公是何言語？官家更是用心。公曰：太后照管則衆人自照管，間有傳上禁中過失事。公曰：豈有殿上不曾錯了一語而入宮門得許多錯？來自爾妄傳者稍息。上疾甚，出言或不遜。太后不樂，大臣有陰進廢立之計者。公嘗奏事簾前，太后嗚咽流涕，具道不遜狀。公曰：此病耳，病已必不爾。子病母可不容乎？太后曰：皇親輩皆笑太后欲於舊窠尋鬼兒。

公曰太后不要胡思亂量少間歐陽公進曰太后事仁宗數十年仁聖之德著於天下昔溫成驕恣太后處之裕然今母子間反不能忍耶太后曰得諸君知此善矣公曰此事何獨臣等知之中外莫不知也太后意稍和公復進曰仁宗在位久德澤在人故一日晏駕天下稟承遺命奉戴嗣君無一人敢異同者今太后一婦人臣等五六措大耳舉足造事非仁宗遺意天下誰肯聽從太后默然他日魏公等見上上曰太后

待我無恩。公曰：自古聖帝明王，不爲少矣。然獨稱舜爲大孝，豈其餘不孝也？父母慈愛而子孝，此常事，不足道。惟父母不慈愛而子不失孝，乃可稱爾。今恐陛下事太后未至，父母豈有不慈者？上大悟，自是不復言。

慶曆初，仁宗久不視朝。一日康復，坐便殿，召二府呂許公夷簡聞命移刻方赴。中使數輩促公同列，亦贊速行。公愈緩轡。既見，上曰：久疾方平，喜與卿等相見，而來何遲也？公曰：陛下不豫，中

外頗憂。一旦聞急召近臣。臣若奔馳以進。慮人心驚動耳。

呂正惠公端爲相。寇萊公準爲樞密副使。時保安軍奏獲李繼遷母。太宗欲誅之。獨召寇公與謀。寇公退過相幕。公疑必謀大事。遂謂寇公曰。上戒君勿言於端乎。寇公曰否。公曰。邊鄙常事。端不必與知。若軍國大計。端備位宰相。不可不知也。寇公以告。公曰。殺之非計也。願少緩。端將覆奏。入曰。昔項羽欲烹太公。高祖曰。願分我一

杯羹夫舉大事者不顧其親况繼遷悖逆之人乎徒結怨讐愈堅其叛心爾上曰然則何如公曰以臣之愚宜置於延州使善養視之以招來繼遷雖不能卽降終可以繫其心而母死生之命在我矣上撫髀稱善卽用其策其母後病死延州繼遷尋亦死繼遷子竟納款公之力也夏州饑趙德明表求粟百萬朝議不知所出或請以詔責之王文正公且請勅有司具粟百萬于京師而詔德明來取德明得詔曰朝廷有人

遂止

契丹奏請歲給外別假錢幣真宗以示王文正公旦公曰東封甚近車駕將出彼以此探朝廷意耳請于歲給三十萬內各借三萬俟次年除之契丹大慚次年復詔有司契丹所借金帛六萬事屬微末仰依常數與之後不爲例

元昊遣使求通已在界上而契丹使來請拒絕之時主者答書云元昊若盡如約束則理難拒絕仁宗以書示張公方平公上議曰如此是拒

契丹納元昊得新附之小羌而失久和之強虜
矣卽封冊元昊而契丹使再至能終不聽乎不
聽契丹之怨必自是始若聽而絕之則中國無
復信義永斷招懷之路是一舉而失二虜也當
賜元昊詔曰朝廷納卿誠款本緣契丹之請今
聞卿招誘契丹邊戶失舅甥之歡契丹遣使爲
言卿宜審處其事但嫌隙朝除則封冊暮行如
此庶爲兩得時人服其精識

南海蠻酋虐其部人款宜州自歸者八百

餘人議者以爲不可納。蔡文忠公齊獨曰：蠻去殘酷而來求生，宜內之荆湖，賜以閒田，使自營。皆吾赤子也。今却之，必不復還其部，散入山谷，當爲後憂。爭之不能得，後數年蠻果爲亂。

王文康公曙、薛簡肅公奎俱嘗鎮蜀。一日二公於章獻太后前奏事，已因語蜀事。文康曰：臣在蜀時，有告戍卒反，執而斬之，遂無事。簡肅曰：臣在蜀時，亦有告戍卒反者，叱出之，亦無事。張徐公者，任馬軍都帥，被旨選兵，下令太峻，兵

欲變真宗召二府議曰若罪張耆今後帥臣何以御衆捕之則都下驚擾尤爲不可王文正公旦曰累奉德音欲任張耆樞密府今卽擢用使解兵柄軍士自安矣乃進耆爲樞密副使諸帥遞遷軍心遂定

王武恭公德用知定州一日散軍糧軍士嫌米黑誼讓監官懼匿四卒以黑米呈公曰汝從我當自入倉視之乃往召專副問曰昨日我不令汝給二分黑米八分白米乎曰然然則何不先

給白米。後給黑米。此輩見米黑。以爲所給盡如
是。故誼耳。專副對曰。然某之罪也。公杖專副人
二十。又呼四卒謂曰。黑米亦公家物。不給與汝
曹。當棄之乎。四卒相顧曰。向者不知有八分白
米故耳。某等死罪。公亦人。杖二十。召指揮使責
之曰。汝何不戢士使如此。指揮使叩頭伏罪。捨
之。倉中肅然。

治平中。夏國泛使至。云將以十事聞朝廷。而未
言何事。時太常少卿祝諮主館伴。先見樞府。旣

而見丞相韓魏公。公問樞密何語。曰。樞府教云。受命館伴。不敢輒及邊事。公笑曰。豈有止主飲食。而邊事不管耶。公乃徐料十事授祝。曰。某事以某辭對。某事以某辭折。及宴。使者言十事。凡八事如所料。祝如教答之。夏人聳伏。

劉豫榜山東。妄言御藥馮益遣人收買飛鴿。因有不遜之語。知州奏僞榜丞相趙忠簡公。鼎與張忠獻公浚進呈。忠獻奏乞斬益以釋謗。高宗不應。乞遠竄。亦未允。忠簡奏曰。馮益事實曖昧。

然有闢國體。若畧不加罰。外議必謂陛下實嘗遣之。不若暫解其職。姑與外祠。以釋衆惑。上欣然出之。浙東忠獻怒忠簡不助已。忠簡曰。小人急之則合。緩之則自相擠。昔袁紹李訓必欲盡誅宦官。基亂漢唐。其事可鑒。今益罪雖誅不足。以快天下。然羣阬恐人主手滑。必將力爲營救。不若謫而遠之。旣不傷上之意。彼見謫輕。亦不致力。又幸其去位。可以次規進。安肯容其入耶。若攻之已甚。令此輩側目。其黨愈固。不可破矣。

忠獻歎服